

HUSAT TRU I STRONGIM IKONOMI BILONG PAPUA NIUGINI?

Ol bikpela kampani na gavman i mekim planti toktok long nius long ol bikpela oil, ges, login, oil pam, pis na gol projek i kamap insait long kantri. Oli tok olsem ol dispela projek i salim planti risos bilong kantri igo ausait, na long bekim bilong dispela, planti moa moni i kam insait long kantri.

Planti taim ol toktok bilong wok bisnis insait long kantri isave lukluk moa long oil, ges, gol, diwai, pis na ol bikpela oil pam projek. Ol nius lain tu i mekim yumi bilip olsem dispela em ol samting we i save kirapim senis long kantri.

Nogat planti toktok na luksave long ol wok bisnis we isave kamap long ples we mak bilong em i antap moa. Dispela kain pasin i daunim hat wok bilong ol manmeri long ples we i kamapim gutpela sindaun long giraun bilong ol yet.

Dispela ol wok bisnis we i lukluk moa long salim ol risos bilong kantri igo long ol narapela kantri i save kisim bek liklik moni moa long ol wok bisnis insait long kantri. Yumi ting ol liklik wok didiman, bai givim yumi liklik moni, tasol dispela ino tru.

Ol planti wok painim aut long tenpela krismas igo pinis, i lukluk long sindaun bilong ol manmeri long ples. Dispela wok painim aut i soim olsem igat planti kainkain wok i kamap long kastom giraun we i strongim sidaun bilong ol manmeri na halivim ol long lukautim famili.

Dispela kain wok painim aut i mekim yumi luksave long hamas moni ol wan wan famili i save kisim, na tu hamas moni kantri i kisim. Gavman tu i mas luksave long dispela kain wok painim aut na mekim ol disisen long lukautim kantri, na edukesen sistem. Yumi wan wan manmeri iken skelim na tingting long wonem kain gupela senis i mas kamap long kantri.



Piksa bilong mama salim kaukau emi planim long giraun bilong em yet.

Emi tru olsem insait long wanwan yia, moni mak bilong ol gaden kaikai we ol pipol yet i planim na salim i save stap long moni mak bilong K20,000.

Wantaim dispela luksave, yumi iken tok olsem ol 1 milion hauslain i stap long ples i wok long kamapim 40 billion kina long wanwan yia. Dispela i abrusim moni mak bilong gol (1.7 billion kina), na gas (1.69 billion kina) na oil (1.63 billion kina), na kopa (0.75 billion kina), na login (0.8 billion kina) na oil pam (0.47 billion kina) we taim yu bungim moni mak bilong olgeta dispela risos wantaim bai i soim olsem kantri i kisim tasol 7 billion kina.

Gavman i mas tingim dispela moni mak bilong 40 billion kina taim emi laik mekim disisen long bringim ol risos projek we i ken bagarapim ol bus, giraun na wara bilong yumi na kamapim birua long ol papa na mama giraun.

Yumi mas luksave na skelim gut tru long sindaun yumi inap long bagarapim sapos yumi tingting long bringim ol projek i kam insait long giraun bilong yumi.

Yumi mas luksave tu olsem ol wok i save kamap long ples i halivim long strongim sindaun bilong moa long 2 milion manmeri husait i wokim gaden kaikai o wok kakao, kopra, vanila, galip na lo lukautim pik, kakaruk na memek bilong salim na lukautim famili.

Planti moa wok painim aut we ol benk na ol haus moni i kamapim i lukluk tasol long wei bilong mekim moni bilong ol bikpela kampani long taon na citi bilong wonem dispela ol kain wok bisnis i save putim moni bilong ol long benk na kisim luksave long ol benk.

Tasol dispela kain wok painim aut i save aburusim na i no luksave long pasin bilong baim na salim we i kamap long ples na long striit namel long ol pipol long ples we oli kolim “infomol treid”. Sapos yumi bungim moni bilong olgeta dispela wanwan manmeri long kantri husat i wokim infomol treid, moni mak i sanap namel long 30,000 na 40,000 kina insait long wanwan yia.

Olgeta dispela toktok emi soim olsem taim ol pipol i lusim kastom giraun bilong ol, bai ol i lusim tu ol rot bilong mekim ol wok bisnis na kantri tu bai lusim tu bikpela moni.



Tupela man i salim basket na trei oli wokim wantem kanda ikam lo bus bilong ol yet.

Sapos yumi laik lukim trupela na gutpela wok senis ikampi insait long ol ples na kantri na kamapim gutpela sindaun bilong olgeta manmeri bilong dispela kantri, gavman imas givim luksave na strongim wok bilong ol pipol antap long kastom giraun bilong ol yet long ples. Ol pipol tu mas noken givim giraun long ol ausait lain. Noken registarim kastom giraun bilong yu!



Ol manmeri i kam salim kofi bin long ol kofi baia lo Goroka taun.